



**Majlis Ugama Islam Singapura**

**Khutbah Jumaat**

**27 Mei 2016 / 20 Syaaban 1437H**

**Menyebarkan Risalah Rahmah**

الْحَمْدُ لِلَّهِ الْعَلِيِّ الْحَمِيدِ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَهُوَ عَلَى كُلِّ شَيْءٍ شَهِيدٌ، وَأَشْهَدُ أَنَّ سَيِّدَنَا مُحَمَّدًا عَبْدَهُ وَرَسُولَهُ الْمَبْعُوثُ بِالرَّحْمَةِ وَالْقَوْلِ السَّدِيدِ، اَللّٰهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ تَسْلِيمًا كَثِيرًا. أَمَّا بَعْدُ، فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dirahmati Allah,

Hanya tinggal beberapa hari lagi umat Islam seluruh dunia akan menyambut kedatangan bulan Ramadan al-Mubarak. Marilah sama-sama kita manfaatkan di hari-hari terakhir bulan Syaaban ini untuk terus gigih membuat persiapan rapi bagi menyambut bulan Ramadan. Moga segala perancangan kita mendapat keberkatan daripada Allah Azza wa Jalla.

Saudara, Allah s.w.t telah menjelaskan dengan terang sekali akan tujuan diutuskan Nabi Muhammad s.a.w melalui firman-Nya:

وَمَا أَرْسَلْنَاكَ إِلَّا رَحْمَةً لِّلْعَالَمِينَ ﴿١٠٧﴾

Maksudnya: *“Dan tiadalah kami mengutus kamu melainkan untuk (menjadi) rahmat bagi semesta alam”*. [Surah Al-Anbiyā’ 21:107]

Jika diteliti ayat ini, akan terlihat dua maksud yang amat menarik sekali bagi umat Islam untuk memikirkannya. **Pertama:** Allah mengutus Nabi Muhammad s.a.w membawa mesej Islam yang merupakan rahmah bagi sekalian alam. **Kedua:** Nabi Muhammad s.a.w itu sendiri merupakan mesej Allah, mesej rahmah kepada semesta alam.

Melalui kedua-dua maksud di atas, akan tergambar bahawa ke mana sahaja Baginda Rasulullah s.a.w pergi dan ke mana sahaja Rasulullah s.a.w berada nescaya di situ ada rahmah dan akan terasa tersebarnya rahmah, kedamaian dan kebaikan.

Nilai rahmah inilah juga yang telah mewarnai kehidupan para sahabat, para Tābi’īn dan para Tabī’ Tābi’īn di saat mereka membawa mesej ajaran Islam di seluruh pelusuk dunia. Mereka adalah golongan yang sentiasa peka untuk berada di barisan awal di dalam menyebarkan prinsip dan nilai-nilai murni yang universal kepada umat manusia. Mereka berhak mendapat pujian daripada Allah melalui firman-Nya:

وَكَذَلِكَ جَعَلْنَاكُمْ أُمَّةً وَسَطًا لِتَكُونُوا شُهَدَاءَ عَلَى النَّاسِ  
وَيَكُونَ الرَّسُولُ عَلَيْكُمْ شَهِيدًا

Maksudnya: *“Dan demikian (pula) Kami menjadikan kamu (umat Islam) umat yang adil dan pilihan agar kamu menjadi saksi atas (perbuatan) manusia dan agar Rasul (Muhammad) menjadi saksi atas (perbuatan) kamu”*. [Surah Al-Baqarah 2:143]

Sidang Jumaat yang dirahmati Allah,

Sifat suka membuat kebaikan, berlumba-lumba membuat kebajikan dan peka agar sentiasa berada di barisan hadapan dalam membuat sesuatu yang boleh memberi manfaat kepada seluruh alam dan bukan sahaja masyarakat Islam adalah suatu sifat yang amat digalakkan oleh Islam. Dalam hal ini Baginda Rasulullah s.a.w telah bersabda:

لَنْ يَشْبَعَ الْمُؤْمِنُ مِنْ خَيْرٍ يَسْمَعُهُ حَتَّى يَكُونَ مُنْتَهَاهُ الْجَنَّةَ

Maksudnya: *“Seorang mukmin tidak akan merasa cukup (membuat) kebaikan yang didengarnya sehingga dia wafat dan dimasukkan ke dalam syurga”*. [Hadith riwayat Imam At-Tirmidzi]

Ruang untuk membuat kebaikan dan kebajikan kepada seluruh makhluk amat banyak sekali. Justeru itu Imam al-Nawawi di dalam kitabnya Riyādh al-Sālihīn telah meletakkan satu bab yang diberi judul “Penjelasan tentang banyaknya jalan untuk

buat kebaikan”. Di dalam bab tersebut beliau menghimpunkan pelbagai hadith yang menganjurkan perbuatan baik sama ada kepada manusia, binatang dan juga sekitaran.

Sehubungan dengan itu, umat Islam hari ini harus merasa yakin dengan prinsip dan nilai-nilai universal yang terkandung di dalam al-Quran dan al-Hadith. Bahkan mereka harus menjadi pelopor setiap kebaikan di mana jua mereka berada secara khusus ketika mereka berinteraksi sesama manusia.

Sidang Jumaat yang dirahmati Allah,

Tiga minggu yang berturut-turut, mimbar Jumaat memperkatakan soal hubungan manusia sesama manusia sama tidak kiralah sesama yang Muslim ataupun saudara seinsan lain.

Di saat kita berinteraksi dengan mereka, teladanilah peribadi Rasulullah s.a.w yang bersifat rahmah dan yang membawa rahmah kepada sekalian alam. Jadilah kita sebagai masyarakat Islam Singapura yang menjadi contoh terbaik dalam setiap kebaikan dan kebajikan. Pastikan tingkah laku kita serta tutur bicara kita itu sentiasa indah dan mulia. Jangan disebabkan keburukkan akhlak dan budi pekerti, kita ini menjadi hijab yang menutupi keindahan ajaran murni Islam di mata umat manusia.

Dengan kedatangan Ramadan ini, ketika mana kita sebagai sebuah masyarakat lebih giat menabur bakti dan melakukan kebajikan, pastikan kebaikan dan rahmah dapat menyentuh setiap individu yang berurusan dengan kita, tidak kira bangsa mahupun agama. Sebagai contoh, sudah menjadi tradisi masyarakat Islam Singapura untuk berkongsi juadah bersama jiran tetangga mereka yang Islam mahupun yang bukan Islam setiap Ramadan. Teruskanlah budaya ini. Mudah-mudahan ia menjadi pemangkin kepada kedamaian, persefahaman dan bahkan perasaan saling menghormati yang berpanjangan.

Saudara, dalam dunia yang menyaksikan pelbagai konflik dan perkelahian, mohonlah kepada Allah agar kita menjadi pelopor kedamaian. Berdoalah mudah-mudahan Allah meletakkan kunci kebaikan di tangan kita dan generasi kita seterusnya.

Sidang Jumaat yang dirahmati Allah,

Marilah kita sama-sama di penghujung bulan Syaaban untuk terus bermuhasabah. Muhasabah sebagai umat Islam yang cinta kepada kebaikan, cinta kepada kedamaian dan cinta kepada kesejahteraan umat manusia. Muhasabah sebagai umat Islam yang harus menyebarkan risalah rahmah di mana jua kita berada. Marilah kita mengangkat tangan serta memanjatkan doa kepada Allah s.w.t. semoga diperkenankan hajat.

Allahumma Ya Rahmān, ya Rahīm

Kami hadir di penghujung bulan Syaaban ini, mengharapkan redha dan rahmatMu. Tiada daya dan upaya kami, melainkan hanya dengan bantuan serta pertolongan-Mu.

Ya Allah,

Curahkanlah kami dengan kasih sayang-Mu, bantulah kami dengan inayah-Mu, kukuhkanlah ikatan persaudaraan di antara kami dengan mahabbah kerana-Mu, padamkanlah segala kesalahan kami dengan pengampunan-Mu, terimalah segala amal ibadah kami dengan setinggi-tinggi ganjaran di sisi-Mu.

Allahumma Ya Khabīr, Ya ‘Alīm

Kami bermohon kepada-Mu, agar Engkau jadikanlah Ramadan kali ini, Ramadan yang dapat membersihkan hati dan jiwa kami, Ramadan yang meninggikan martabat kemanusiaan kami, Ramadan yang menyuburkan rasa kesyukuran kami, Ramadan yang melahirkan rasa cinta di antara kami, Ramadan yang meneguhkan pendirian kami, dan Ramadan yang membawa rahmat bagi segenap alam ini. Amin Ya Rabbal Alamin.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ  
الآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ  
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ  
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا  
فَوْزَ الْمُسْتَغْفِرِينَ وَيَا نَجَاةَ التَّائِبِينَ.